

太上感应篇

太上曰：祸福无门，
惟人自召；善恶之
报，如影随形。是以
天地有司过之神，依
人所犯轻重，以夺人
算。算减则贫耗，多
逢忧患；人皆恶之，
刑祸随之，吉庆避

之，恶星灾之；算尽
则死。又有三台北斗
神君，在人头上，录
人罪恶，夺其纪算。
又有三尸神，在人身
中，每到庚申日，辄
上诣天曹，言人罪
过。月晦之日，灶神
亦然。凡人有过，大

则夺纪，小则夺算。

其过大小，有数百

事，欲求长生者，先

须避之。是道则进，

非道则退。不履邪

径，不欺暗室；积德

累功，慈心于物；忠

孝友悌，正己化人；

矜孤恤寡，敬老怀

幼；昆虫草木，犹不
可伤。宜悯人之凶，
乐人之善；济人之
急，救人之危。见人
之得，如己之得；见
人之失，如己之失。
不彰人短，不炫己
长；遏恶扬善，推多
取少。受辱不怨，受

宠若惊；施恩不求
报，与人不追悔。所
谓善人，人皆敬之，
天道佑之，福禄随
之，众邪远之，神灵
卫之；所作必成，神
仙可冀。欲求天仙
者，当立一千三百
善；欲求地仙者，当

立三百善。苟或非义
而动，背理而行；以
恶为能，忍作残害；
阴贼良善，暗侮君
亲；慢其先生，叛其
所事；诬诸无识，谤
诸同学；虚诬诈伪，
攻讦宗亲；刚强不
仁，狠戾自用；是非

不当，向背乖宜；虐
下取功，谄上希旨；
受恩不感，念怨不
休；轻蔑天民，扰乱
国政；赏及非义，刑
及无辜；杀人取财，
倾人取位；诛降戮
服，贬正排贤；凌孤
逼寡，弃法受赂；以

直为曲，以曲为直；
入轻为重，见杀加
怒；知过不改，知善
不为；自罪引他，壅
塞方术；讪谤圣贤，
侵凌道德。射飞逐
走，发蛰惊栖；填穴
覆巢，伤胎破卵；愿
人有失，毁人成功；

危人自安，减人自
益；以恶易好，以私
废公，窃人之能，蔽
人之善；形人之丑，
讦人之私；耗人货
财，离人骨肉；侵人
所爱，助人为非；逞
志作威，辱人求胜；
败人苗稼，破人婚

姻；苟富而骄，苟免
无耻；认恩推过，嫁
祸卖恶；沽买虚誉，
包贮险心；挫人所
长，护己所短；乘威
迫胁，纵暴杀伤；无
故剪裁，非礼烹宰；
散弃五穀，劳扰众
生；破人之家，取其

财宝；决水放火，以
害民居；紊乱规模，
以败人功；损人器
物，以穷人用。见他
荣贵，愿他流贬；见
他富有，愿他破散；
见他色美，起心私
之；负他货财，愿他
身死；干求不遂，便

生咒恨；见他失便，
便说他过；见他体相
不具而笑之，见他材
能可称而抑之。埋蛊
厌人，用药杀树；恚
怒师傅，抵触父兄；
强取强求，好侵好
夺；掳掠致富，巧诈
求迁；赏罚不平，逸

乐过节；苛虐其下，
恐吓于他；怨天尤
人，呵风骂雨；斗合
争论，妄逐朋党；用
妻妾语，违父母训；
得新忘故，口是心
非；贪冒于财，欺罔
其上；造作恶语，谗
毁平人；毁人称直，

骂神称正；弃顺效
逆，背亲向疏；指天
地以证鄙怀，引神明
而鉴猥事。施与后
悔，假借不还；分外
营求，力上施設；淫
欲过度，心毒貌慈；
秽食餽人，左道惑
众；短尺狭度，轻秤

小升；以伪杂真，采
取奸利；压良为贱，
谩蓦愚人；贪婪无
厌，咒诅求直。嗜酒
悖乱，骨肉忿争；男
不忠良，女不柔顺；
不和其室，不敬其
夫；每好矜夸，当行
妒忌；无行于妻子，

失礼于舅姑；轻慢先
灵，违逆上命；作为
无益，怀挟外心；自
咒咒他，偏憎偏爱；
越井越灶，跳食跳
人；损子堕胎，行多
隐僻；晦腊歌舞，朔
旦号怒；对北涕唾及
溺，对灶吟咏及哭；

又以灶火烧香，秽柴
作食；夜起裸露，八
节行刑；唾流星，指
虹霓；辄指三光，久
视日月；春月燎猎，
对北恶骂，无故杀龟
打蛇：如是等罪，司
命随其轻重，夺其纪
算。算尽则死；死有

余责，乃殃及子孙。
又诸横取人财者，乃
计其妻子家口以当
之，渐至死丧。若不
死丧，则有水火盗
贼、遗亡器物、疾病
口舌诸事，以当妄取
之值。又枉杀人者，
是易刀兵而相杀也。

取非义之财者，譬如
漏脯救饥，鸩酒止
渴；非不暂饱，死亦
及之。夫心起于善，
善虽未为，而吉神已
随之；或心起于恶，
恶虽未为，而凶神已
随之。其有曾行恶
事，后自改悔，诸恶

莫作，众善奉行，久
久必获吉庆；所谓转
祸为福也。故吉人语
善、视善、行善，一
日有三善，三年天必
降之福。凶人语恶、
视恶、行恶，一日有
三恶，三年天必降之
祸。胡不勉而行之？